

02 JUN 2001

Agong-Panji

AGONG HADIRI ISTIADAT PERBARISAN MENGARAK PANJI-PANJI

KUALA LUMPUR, 2 Jun (Bernama) -- Yang di-Pertuan Agong Sultan Salahuddin Abdul Aziz Shah berangkat ke istiadat perbarisan mengarak panji-panji sempena Ulangtahun Hari Keputeraan Rasmi Seri Paduka Ke-75 di Dataran Merdeka di sini pagi ini.

Seri Paduka diiringi Raja Permaisuri Agong Tuanku Hajah Siti Aishah.

Turut hadir ialah Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohamed Ali, Timbalan Perdana Menteri Datuk Seri Abdullah Ahmad Badawi, Menteri Pertahanan Datuk Seri Najib Tun Razak dan Menteri Penerangan Tan Sri Khalil Yaakob.

Panglima Angkatan Tentera Jeneral Tan Sri Mohamed Zahidi Zainuddin serta panglima ketiga-tiga cabang Angkatan Tentera Malaysia (ATM) dan para perwakilan negara asing.

Seramai 388 anggota tentera dan 16 pegawai dari ketiga-tiga cabang ATM menyertai perarakan membawa panji-panji yang diiringi lagu-lagu perajurit dan kebangsaan yang dimainkan oleh Pancaragam Gabungan Angkatan Tentera.

Istiadat dimulakan dengan perbarisan Hormat Diraja diikuti tembakan meriam dan lintas hormat di udara oleh lima helikopter ATM yang membawa Jalur Gemilang.

Seri Paduka kemudian diiringi Zahidi memeriksa perbarisan kehormat.

Hampir 3,000 orang ramai termasuk pelancong menyaksikan upacara itu.

-- BERNAMA

YBK AZZ RHM